

四庫全書

集部

欽定四庫全書

兩宋名賢小集卷三百六十

宋 陳思 編

元 陳世隆 補

玉楮詩藁

岳珂

排灣遇風對听即彭澤舊縣二首

隱約山藏霧 砢砢地起雷 黑風吹海立 白雨過江來 齊

樂正應爾沛兒安在哉雌雄誰與辨試上楚王臺
岼上蘆搔首門前柳折腰千年已陳迹四海又驚颺宿
翳何當淨高風幸未遙柴桑那可見身世且漂搖

發排灣過小孤彭郎祠下遂宿馬當

山小孤磯彭郎中納百谷吞三江江流澎湃不可當勢
比折木傾銀潢濁龍一支走馬當宛然天驥初騰驤回
韁矗立江中央西從岷峨暨睢漳南派五湖通三湘後
先奔走爭回翔前驅怒氣軒且昂倏然過此意洋洋儼

然天子朝明堂坐受萬國來
氏羌五瑞咸輯珪與璋拜
舞軒陛心俱降我聞乾坤融
結盤古開混茫流峙異勢
分輿方巍巍神禹治水平懷
襄底义一意先荆揚此山綠
字元弗詳脫畧丘垤登毫芒
後人考古徒縑緗未覩此
石天經地紀之維網君不見
古馬當今馬當記牒雖漏
處有常上馬柱天植極扶三
光下馬立地作鎮安八荒
磅礴杳靄排穹蒼削平瀕洞
壓鴻龐星羅碁布高蓋張
百靈臣伏絕影藏坐使四海
順流終古無濫觴噫唏侔

特那可量我欲用世取所長便當提作朱亥神椎推猶
狂北絕大漢泉名王何空更度金浮梁一拯墊溺躋康
莊連山疊阜化困倉盡飽萬姓飢火腸持此報上歌如
岡徧開壽域同吟疆自今永永三十六萬歲淳古比九
皇山峒峒兮江湯湯

過鴈汭

駢集千艘岸喧拏百里聲黃旗優士賈白奪困商程吳
楚方憂慮耕桑漫計贏坐觀還一笑闕市古無征

入蕪湖港過吉祥寺

昔時曾訪後山松
天道那令霸業窮
夙听人觀新太守
擁門僧認舊詩翁
隱磯漫指六朝事
魯港嘗淹五宿風
從此片帆湖際去
只應日在瑞雲東

黃池

易取日中市
陶居天下衝
南琛下甌粵
西旅輯巴庸
四顧斷登壘
萬家樓聚蜂
寢丘端不類
何以誇吾封

銀堰

舊說金為土今聞銀灌城古人真作事後世只虛名
策雖曾立厰倉竟未成道旁雖築室吾欲誦坻京

三塔寺寒光亭張于湖書詞寺柱吳毅夫命名後

軒二首

竹裏逢僧院殘碑不記年鴈題三萃堵龍化兩魁躔寶
正號應紀元豐墨尚鮮寒光定何似誰放五湖船
雲煙千嶂遠風月四時新笠澤昔魯望鏡湖今李真何
時脫塵絆來此寄垂綸一艇葦間宿寒光長是鄰

滄中水淺輿從下水肩舟二首

揚塵驚淺瀨平陸比通津絕贖正扛鼎化身如轉輪未
輿譏代畜不守愧懸鷄誰借商巖手一篙烟水春

水面平如砥湖心淺不波駕肩同作楫袖手莫談河不
見成橋散空傳度磧馳勞生正應爾空愧白鷗莎

去歲五月二十八日發雲錦亭以六月旦謁富池
而行是夜始望見廬山今歲以此日正在湖滄中
念歲月之倏忽驚道塗之勞勩回首感歎二首

雲錦亭前夕照紅興唐寺下曉聞鐘傷心楚水又經歲
回首吳雲知幾重萬里同盟祗鷗鷺三江嘯浪憶魚龍
如今且對湖光裏八九重開夢澤宵

去年今日富池頭浩蕩風烟卷雪樓湖海百年雙鬢老
荆揚兩地一萍浮河斜左界流清夜雲密西郊望有秋
通塞隨時何必問明朝又放溧陽舟

玉唾壺

古來玉唾壺歌罷壺為缺憂時一片心常惜志士烈鷗

鷄瑩出昆吾，刀截肪溫潤。如切膏悲歌，聲動行雲高。何
愛一闕稱世豪，馬生冀州北未省。能伏樞骨拳髻禿，利
四蹄鳳膺赭。汗人不知夕陽芳草，顧影嘶猶憶振鬣。天
山西可憐，歲華暮萬里。瑤池路鹽車，輓輓踰太行。夜嚼
枯草畫服箱，上天振策無王良。徒有此志，今未忘荆山
韞明月。良工斲不徹，抱璞昔三別。曾泣卞和血，既斲復
毀不可磨。尊前對酒聽浩歌，唾壺雖缺璞更多。騏驎不
生奈老何。

中橋二首

過了平湖又小溪却從蕪徑訪多歧如何江上乘風鷁
化作泥中曳尾龜誰遣旌旗行沮洳定知鼓吹宅連漪
中橋咫尺未由到且作吳兒玩水嬉

澤國何村不着橋中橋跬步即雲霄青帘望市雷鳴腹
黃帽推船水沒腰六月彤雲搖旱火一湖清浪捲晴飈
平生未慣舟行陸鐵石心腸也合消

泥行終日至晡始抵中橋六絕

終日泥行足半胼中橋望見已多時一篙不得風漪力
早被青帘望得知

平川烟草碧如煙曲指琉璃翡翠田一水分明度舟楫
如何平陸却推船

農家未補眼前瘡却種湖田作早糧別浦誰家夜鳴櫓
踐殘一半不成秧

兩岬黃茵半畦深薈餘短髮更傷心莫疑一點無生意
盡是田家眼內針

歷盡清灣日已晡
斷虹吹浪過平湖
兒癡不識中橋影
問道前山有雨無

到得中橋一徑斜
岸傍沽酒兩三家
長年醉卧桑陰下
鼓吹猶煩兩岸蛙

夜宿橋畔

裊纜宿前灣
平蕪決漭間
舫移星在戶
岬迴斗藏山
淺瀨不勝揭
浮生何日閒
夜深聞過櫓
知是溧陽還

問道宜興二首

買田陽羨說東坡想見溪山勝槩多曾是中營誇繡帽

尚傳遺廟鎖雕戈斬蛟義槩人猶記化蝠仙蹤事易訛

我欲問津先訪古古靈題蹟試摩挲

宜興張公洞洞刻古靈題蹟客有為

予言古靈後乃仙

去者末句故云

粹儀夾紵盛花鈿人說先朝祀玉仙菴盡有溪春不老

煉丹無竈古空傳乞靈贖擬羞蘋藻養性何妨學汞鉛

書閣蒼龍應不遠為君重寫白雲篇

天申宮夾紵玉仙聖母章聖禱祠之

地

遇順風

身世飄搖似轉蓬，歷湖經海任西東。
凌波小試檜松楫，宿露飽親葭葦蓬。
兩岼居然驚脫兔，一帆從此迅冥鴻。
到頭天意君須會，吾道區區未窮。

楊梅

滄歷三家市，梅垂萬顆酸。
烽池看火樹，樓室試金丹。
風露盈藍重，冰霜透齒寒。
他楊應不類，留與子雲看。

道中思廬山

廬山三百里巨浸壓宮亭勢接九江匯峰連萬古青淵
源開道術詭幻雜仙靈厚地蟠竒秀雄標動杳冥濃嵐
晨歷歷流水夜泠泠雪擁瓊瑤障花繁錦繡屏吾居嘗
靜對親處異空聆瀑布手自酌斜川身所經龍淵敲短
策鳥道絕危陁正派尊涵泳高山有典刑竭來三涉徑
知閱幾周星白傅松猶在陶潛菊未零堅高思並轍今
古共忘形便擬安圭竇終期老澗壑忽嚴大君詔言駕
小侯輶一別門垂柳重觀階換藁出山羞小草浮海又

流萍頗覺登山屐翻成泛宅船
回頭看豹霧望眼隔鸞汀
縱抱知還志何時振倦翎

寄胡敬二首

西風送我溧陽溪終日蓬窗祇有詩
黃篔未妨牀着筆青綯不管鬢成絲
雁隨去訊勞君問鷗憶同盟尚我隨
想見歸舟不多日一樽牛渚訪秋期

潯陽江上無羶客別後音書杳未通
蕉鹿定應憐左計尊鱸端是待西風
漫懷離思人猶遠欲寓吟情句未工

朝列鸚鵡問消息一箋莫靳寄詩筒

寄高建寧尚書二首

鶴書幾到闔閭城見說君王憶姓名
衡岳雲間傳諫艸
考亭月冷欠文盟不從金馬登丞輔
却托銅菟煩客卿
天意未應無定據管教吾道致升平

已分耕畦老一犁天風吹夢入姑溪
誰憐北垞騎牛背
又踏東華放馬蹄槐綠不妨穿禁漏
棗紅便覺動邊聲
歸途願請平戎策政恐曹裝赴詔泥

張公洞二首

祚絕千齡運名標二代仙
鵲鳴應徙地蝠化已先天
風洞疑無底丹爐信有緣
祗應巖下奕為我一覘然

驢跡驚初踐鷹盤若有靈
石橋通道戶金鑰鎖硃庭
滴乳看成像登臺仍刻銘
更憐國山寺真欲比云亭

望北關門

萬里雲開瑞日明
雕甍遙接九重城
觚連丹鳳紅雲繞
關度青牛紫氣迎
新第千門俱改觀
舊溪二紀漫關情

今宵且向橋頭宿又聽鼕鼕打六更

六月二十一日內引賜對緝熙殿玉音宣問漏下
數刻將退賜金幣香茗有差既而御筆除長地官
將指八路復賜一札兼鎮姑熟敬紀感遇以昭恩

榮四首

曲廊青瑣午陰遲一朵紅雲擁緝熙便座詢猷親帝問
近璫承詔引朝儀小臣曾是鷓鴣舊夙幸還瞻龍鳳姿
出殿陸郎驚漏下兩行簾月影參差

二紀身陪獻納班今朝始得拜金鑿裊蹄范鑄分天馥
鮫織開奩薦月團奎壁近霑琅鈕濕斗牛直射寶光寒
糜捐雖有平生志自覺君恩報稱難

曾窺遺志辨中朝更帖驍游八座貂空有丹心酬雨露
詎應赤脚踏煙霄人絲汲汲知堯舜我豈區區事管蕭
不是鸞臺勤再詔狂言何以發弱莖

殿上恭承清問俾
條陳醜茗利病以

間辭不獲乃奉

詔詳見奏藁

單輅從此歷湖陰自愧使蕃聖澤深贈策不煩秦士歎

埋輪聊見漢臣心
主憂未解誠知辱
民瘵猶思力不任

表語拳拳懷美報
用中聊以當虞箴

謝御札表狂妄有
云惟克用中是名

報上此
真忱也

中秋夜宿旌德觀無月

滿看金盞湧碧流
西湖從古愜中秋
清班正是重闔隔
塵鞅難從近甸遊
自是四并偏我靳
從知一笑豈人謀
望霓得月良非急
且願西風送雨休

水樂洞

天下水樂洞今歸四姓家
臺池閒日月泉石瘡煙霞
誰挈游人楫還尋奉使槎
明朝重回首清夢隔京華

趙山二絕

驅車結束趁晨暎
水樂簾前共一尊
二十二年如掣電
軟紅依舊暗修門

江南閒殺老尚書
自是承平一絕無
送客折腰書脫腕
試從駝巘看登塗

洞霄宮

峇峩樓觀鎖新宮十里清溪一逕松金榜奎章紅日照
石崖仙影白雲封香殘半掩疑塵榻路轉猶聞隔澗鐘
四牡經行真不枉玉澗初識洞霄龍

九月八日桐川道中二絕

斷雲輕素折山腰山下人家野水橋小隊旌旗空獵獵
不教閒越酒旗招

依稀九日明朝是三徑情知不到家隨分秋光關節物
桐川道上看黃花

是日迎送之車屬道戲成

老仗相如節佳時負酒尊人誰羞夾轂我自愧乘軒
塵土欺貂裊功名付犢禪令君休負夫子不詫王孫

夢尚留三橋旅邸

天上歸來打六更夢回搔首正曹騰玉霜初上三更月
絳綵猶明九市燈聲徹銅魚催漏箭影斜金雀在觚稜
帝鄉東望重回首佳氣何時到五陵

當塗勸駕詩

禮行鳴鹿盛侯邦企慕纔因既見降詔下淄川令第一
才如成紀古無雙雷聲龍化標應奪筆力牛迴鼎易扛
老守殷勤折津柳相期鼓吹渡春江

鹿鳴宴中走筆呈林教授

三級催龍浪朋來盛鹿賓淵源識餘潤騰達已通津融
帳知方盛陸莊應未貧成功豈無日况復值詞人

碧雲亭晚眺二首

閒步碧雲亭寒郊弄晚晴牛羊分暝色禽鳥有春聲城

柳風猶勁溪梅冰共清
屋梁正殘照西望憶長庚
歲華方冉冉耕畝自閒閒
日落青楓浦雲平白苧山
夜城巖警柝昏鼓動層闕
風露汀州冷驚鴻自往還

閏月之臘詔賜銀合臘藥三首

驛使錦連乾傳宣下九天
緘題瞻賜璽走送聽鳴鞭
意溢兼金外恩從玉陛前
更憐戍邊客一騎入秦川
式賜十一種分馳數百程
虎符多俊傑貂帽比恩榮
老矣何能役居然添此名
聖情天樣濶美報誓餘生

無功應自念有賜合先嘗病作餘生累恩頒上劑良願
覘齊國證小效越人方采菲儻留意須先元氣防

兩宋名賢小集卷三百六十

欽定四庫全書

兩宋名賢小集卷三百六十一

宋 陳思 編

元 陳世隆 補

六朝遺事雜詠

楊修字貫失考

新宮

玉案金爐對御牀
巋然應是魯靈光
螭頭直上雙魚尾

不讓西京舊栢梁

靈和殿

得地恩深雨露徧
丹墀左右玉階前
君王屬意君知否
恰似風流美少年

臺城

六朝遺跡好山川
宮闕灰寒草樹烟
江令白頭歸故國
多情合賦黍離篇

石闕

雙石巍巍慰眼青滿朝珍重佐公銘官城府寺俱灰燼
翻使他人漫涕零

衛玠臺

年少才非洗馬才珠光碎後玉光埋江南第一風流者
無復羊車過舊街

九日臺

甲光如水戟如霜御酒杯浮菊半黃東日西風滿天仗
簫韶一部奏清商

東冶亭

忍淚相看酒共持
一生心事幾人知
年年折盡東亭柳
此別綿綿無盡期

三山亭

滿目江山異洛陽
北人懷土淚千行
不如亡國中書令
歸老新亭是故鄉

儀賢堂

兩兩鷄衣白髮翁
講筵談柄坐生風
昭明太子歡相得

應與商山四皓同

聽箏堂

雁柱鸞絃十有三
南山安石位巖巖
逡巡奏罷金滕曲
堂上沾襟嘆不凡

蠶室

摘繭抽絲女在機
茅檐葦箔舊堂扉
年年桑柘如雲綠
翻織誰家錦地衣

馳道

路平如砥直如絃官柳千株拂翠烟玉勒金鑣天下駿
急於奔電更加鞭

齊雲觀

上界笙歌下界聞縷金羅袖鬱金裙倚闌紅粉如花面
不見巫山空暮雲

層城觀

秋星如彈月如梳宮妓香添乞巧爐萬縷千針同一意
眼穿腸斷得知無

秦淮

一氣東南三斗牛
祖龍空為子孫憂
金陵地脈何曾斷
不覺真人已姓劉

直瀆

晝役人功夜鬼功
陽開陰闔幾時終
不聞擲土江中語
爭得盈流一水通

橫塘

早潮纔過晚潮來
一一軒窗照水開
鑑面無塵風不動

分明倒影見樓臺

青谿

傾城傾國兩妃嬪
此地聞名不見人
潛想舊時紅粉面
落花風裏步香塵

北渠

金殿分來玉砌流
黑龍河撒鳳池頭
後庭花落恩波斷
翻與南塘作御溝

覆杯池

金杯覆處舊池枯
此後還曾一醉無
東晉中興股肱力
元皇也學管夷吾

三巖石

蘿蔓藤花歲自添
露痕還似雨痕沾
莫將廢苑為閒地
猶可巖巖作具瞻

半陽湖

江南龍節水為鄉
水不純陰有半陽
一片湖光共深淺
兩般泉脈異溫涼

桃葉渡

桃葉桃根柳岸頭
獻之才調頗風流
相看不語橫波急
艇子翻成送莫愁

麾扇渡

旌旗爍石刃凝霜
甲楯如龍人似狼
羽扇一揮風偃草
策勲多謝顧丹陽

長命洲

梁武慈悲不鼎烹
蒙恩奉養亦虛名
狐狸口腹應潛飽

就死多于日放翁

應潮井

碧甃時時減復增
山頭海面密相應
古來泉脈誰穿過
潮落潮生不斲澄

天闕山

牛頭天際碧疑嵐
王導無稽示妄談
若以遠山為上闕
長安應合指終南

白楊路

殘枝敗葉幾霑春莫問栽培迹已陳
紅雨斜風恨無力
蕭蕭滿路更愁人

射雉場

外作禽荒內色荒三千紅粉日嚴粧
潘妃縱有嫣然態
不步金蓮到射場

銅螭署

挈壺傳箭通天聰鑄出螭螭巧範同
何事腹中藏怪物
人驚蠃蚌氣如虹

焚衣街

短頭金縷又珠胎
煙緒香雲畫不開
御路傍人皆歎息
逡巡紅焰作青灰

三斷石

孫吳紀德舊刊碑
埋沒蝓螭與伏龜
惆悵石岡三斷在
至今猶似鼎分峙

獨足臺

鳥跡分明在帝臺
管絃聲裏輒書來
回頭一覺風流夢

猶得朱門傍水開

燕雀湖

平湖岬側見高墳萬土銜來燕雀羣
鑑面無波天一色此中文藻似儲君

洞玄觀

葛玄功行滿三千白日驂鸞上碧天
留得舊時壇宇在後人方信有神仙

白都山

駕鶴駢鸞自古聞
策名仙籍是真君
天邊舊迹無尋處
滿目青山空白雲

春碣

手拖葛屨坐藜牀
竹樹蕭然一水傍
枕上白雲船下月
卜鄰東碣勝東岡

明慶寺

翠壁如屏旱不枯
一泓甘滑飲醍醐
高僧到此間
絲竹還有金鱗對躍無

兩宋名賢小集卷三百六十一

欽定四庫全書

兩宋名賢小集卷三百六十二

宋 陳思 編

元 陳世隆 補

蒙川詩集

劉黻字聲伯號質翁樂清人淳祐中試入太學由學
官試館職度宗朝累官吏部尚書端明殿學士擁二
王入海及羅浮卒謚忠肅有蒙川集

和文公感興詩六首

至理根一初精微貫高廣寄之形氣中今來齊古往衆
曜列太虛環侍惟斗仰妙化變不測虛靈本常胡并坐
識易陋廉窺學云罔靜玩感興篇剖陳如指掌

仰觀復俯察上下融真機元氣無竒偶魚躍鳶自飛神
聖奠中域動靜心弗違天地斂諸躬照以日月輝遜志
納衆有先慮周萬微胞與豈不夥游泳皇極歸

立朝觀大節炳炳在行已李唐號多士屹立整頽紀前

狄後有韓高風世仰止孤忠翼王祚大論闕非禮老榦
挺冬嶺明魄浸秋水均抱扶世勲心學宣殊軌

默觀義聖書先天著復坤畫畫妙理具森列河圖文字
宙幹生意日月寧辭奔乘承著不息反躬性存存透彼
名利闕洞此道義門用功不精密頻復何由敦

詩道發金石世若壁聽訛正色落芻蕘一掬真意多衆
竅本虛寂其如天籟何不悟康衢謠不識黍離歌

禮樂節性情工夫貴深省愛親篤冰履酬世尚錦綯勿

任忘與助一敬收衆騁威儀筋骸束趣味精神領相彼
屋漏中森若指視炳窮達付天分靈光勿隨境

和淵明貧士詩七首

貧士何所營但知貧可依日月照不盡朝暮常分輝水
淺魚自躍林寒鳥亦飛紛紛苦多求此景誰同歸石田
秋不種難免良士飢飢本士之常獨抱嫠婦悲

把書不釋手非志冕與軒昔有董仲舒三年不窺園道
味歸肝脾違卹厨無烟家貧未為貧有書足可研寤寐

千載心俗子難與言勿嘆師友寂日日親聖賢

高山與流水妙趣歸之琴吾愧學未成匪歎無知音但
向胸中會無勞指下尋種菊或可如得酒聊復斟窮達
非所較動靜一以欽發為琴之聲邈然天地心

平生抱狷介深愧唾面婁蒿萊嘗閉門與世疎應酬奈
何世患稔鯁鯁如馬周顛頓亦良苦饑羸非所憂皇路
益以榛惡作寒蟬儔口禍渺無際困辱祗自求

靜觀松竹姿一塵無相干飲酒不求醉讀書非求官哇

瘠多種菊采亦可餐衣冠背時樣筆硯同歲寒但求
聖賢心肯效兒女顏紛紛往來者笑我柴門關

人生特寄耳何往非萍蓬世挾智反愚予謂拙乃工淵
明有姱節高邁疏與龔大抵豪傑士所見事畧同簞瓢
非謂貧軒冕豈真通儻不達至理冥霧將奚從

扁舟溯江西忽抵梅花洲二忠儼遺像予愧非其儔肝
膽照冰雪要亦捐者流言直不砭時投禍貽親憂山禽
似相盼往來疑勸酬聞坐生萬感矯首觀前修

太玉洞聽琴

無絃不成聲有絃多失真真聲在何所調和方寸春文
操惜已遠孔壇嗟復陳所以桑濮響鄭衛波羸秦詎知
幽谷間迺聞太古淳游魚出寒水鳴鶴橫霜旻休羨廣
陵秘爾雅皆怡神

過柘溪得西字

晴雨春無定東風又轉西地肥桑眼大天暖麥鬚齊
巒頰尋幽所舟行畏惡溪野禽如避客飛上半山啼

朝廷求經明行修之士蜀人楊時發當其選以賤
名薦或謂求之因紀此

汲井綆懼絕植德根懼斲繩樞守貧賤亘亘天境續防
意如長城視身等良玉禰薦匪吾榮臧毀非吾辱清漏
但勿欺人心勝明燭

夜氣

夜氣不盈掬浩然天地清風行石不動雲走月常明陋
巷顏回樂深山大舜耕此心無旦晝萬物自生生

橫浦有感

風雨憂時夢不成，忍將佞舌博功名。
學如谷永生何辱，節似劉陶死亦榮。
蒼蘚無心同客靜，寒梅有眼照人清。
此邦風物多淳古，曾識濂溪與二程。

賦望雲

家山一萬三千里，華髮雙親七十稀。
自許樸忠關社稷，誰知甘旨誤庭幃。
菜根有味逢春早，艸色無邊傍日暉。
總總白雲何處是，夜寒結夢但東歸。

訪西湖

東風吹客到西湖汀草沙禽半識吾
若得數間茅屋在種梅花處伴林逋

兩宋名賢小集卷三百六十二

欽定四庫全書

兩宋名賢小集卷三百六十三

宋 陳思 編

元 陳世隆 補

藤齋小集

劉迎字無黨東萊人初以廕試部掾大定十三年用
薦書對策為當時第一明年登進士第除幽王府記
室改太子司經顯宗特親重之二十年從駕涼陁以

疾卒章宗即位錄舊學之勞賜其子國樞進士第無
黨自號無諍居士有詩文樂府號山林長語詔國學
刊行

雲中君圖

衣若新沐蘭湯薰靈巫拜舞方迎神恍然相見帝者服
九歌昔詠雲中君畫史亦可人妙入造化域羽衣玉塵
美且閒此意不知何處得空明倏忽紛溟濛胡為眷眷
臨壽宮飄然來下復遠舉想像決去隨飛龍祠空人散

秋蕭瑟落日猿聲喚秋色湘天極目青茫茫憑高一望
無南北

梁忠信平遠山水

憶昔西遊大梁苑玉堂門閉花陰晚壁間曾見郭熙畫
江南秋山小平遠別來南北今十年塵埃滿目不見山
鳥靴席帽動千里只慣馬蹄車轍間明窗短幅來何處
亂點依稀澆寒具煥然神明頓還我似向白玉堂中住
濛濛烟靄樹老蒼上方棲閣山夕陽一千頃碧照秋色

三十六峰凝曉光，懸崖高居誰氏宅。
縹緲危欄飲青樾，定知枕石高卧人。
常笑騎驢遠遊客，當時畫史在上方。
想見泉石成膏肓，獨將妙意寄毫楮。
我愧雨立隨諸郎，此行真成幾州錯。
區區世路風波惡，還家特作發願文。
伴我山中老猿鶴。

連日雪惡用聚星堂雪詩韵

朔風朝來放雲葉，紛紛吹落龍沙雪。
山河大地同一如，變化須臾亦奇絕。
參天松頂老猶強，搶地竹頭低欲折。

亂飄書帙愛牕明
狂入地爐驚火滅
重衾方擁膚尚裂
凍筆將書肘先掣
未容衰白點鬢華
只許醉紅生面頰
何人清唱墮梁塵
有客高吟霏鋸屑
昔賢句法今尚在
故事歷劫誰能說
是中勝處公會無
一粒靈丹工點鐵

題十眉圖

寶箱拂塵金鉏膝
周昉丹青見真筆
春風曾憶賦妖嬈
人共畫圖成十一
燭奴香底花光凝
鈿鈿鐵響聞三更
車聲雷動不通語
眼態波橫空送情
蠻雲盤鶴遼天潤

犀玉依依對書札人生何處不相逢還醉武陵溪上月

郭熙秋山平遠用東坡韻

槐花忙過舉子閒舊遊憶在夷門山玉堂會見郭熙畫
拂拭縑素塵埃間楚天極目江天遠楓林渡頭秋思晚
煙中一葉認扁舟雨外數峰橫翠巘淮安客宦踰三霜
雲夢澤連襄漢陽平生獨不見寫本慣飲山綠餐湖光
老來思歸真日日夢想林泉對華髮丹青安得此一流
畫我橫筇水中石

海上

潮撼三山島烟橫萬里沙
蜃樓春作市鼙鼓暮催衙
一曲水仙操片帆漁父家
安期定何處試問棗如瓜

秋郊

秋水四五尺暮山三兩峰
浮雲白臺相落日紫金容
蓑笠前村笛樓臺古寺鐘
殷勤小平遠圖畫憶渠儂

代人憶舊

緩步素絲障微吟紫綺裘
醉便風側帽歌愛月明樓
犀

軸題春恨銅荷滴夜愁風流十年夢燈火漫揚州

題雪浦人歸圖

亂目寶花雨過眉班竹筇拏音迎畫鷁喜態動烏龍水
鏡千江月風琴萬壑松遙知永今夕情話得從容

彥美生朝

壯日里間俠臂彎雙角弓繡鞞紅盞匝貂袖紫蒙茸雲
態自蒼狗玉輝猶白虹為君占壽骨綽起有清風

車輓輓

馬虺隤牛穀棘山行縈紆車輾轆路傍指點是官人老
矣一翁雙鬢白汝牛幸可耕汝馬幸可騎有此可載琴
書歸胡為奔走東西道白髮刁騷被人笑

沙漫漫

沙漫漫草斑斑南山北山相對看我行乃在山之間行
人仰不見飛鳥樹木足知邊塞少沙漫漫草斑斑我行
欲趨西風還僕夫汝莫愁衣單我但著衣思汝寒

寄題安品起官舍北溟

一軒高占鳳麟洲
要作人間汗漫遊
海閣風煙自朝暮
洞天日月幾春秋
夢魂欲拂三花樹
生計聊隨一葉舟
待我丹城訪君去
閨風佳處卜菟裘

莫州道中

楓林葉葉墮霜紅
天未晴華一鏡空
野曠微聞烏鳥樂
草寒時見馬牛風
人生險阻艱難裏
世事悲歌感慨中
白髮孀親倚門處
夢魂千里付歸鴻

和人七夕韻

今古良宵此會同
望窮雲物有無中
人間鈿合三山隔
天上靈槎一水通
鳩鵲樓空紈扇月
鴛鴦機冷苧蘿風
不須更乞蛛絲巧
久矣人生百巧窮

題吳彥高詩集後

片雲蹤跡任飄然
南北東西共一天
萬里山川悲故國
十年風雪老窮邊
名高真北無全馬
詩到西江別是禪
頗憶米家書畫否
夢魂應逐過江船

代王簿上梁孟容副公二首

妙年椽筆賦長楊一日聲名滿四方天上風流青瑣客
人間嘉慶綠衣郎錦囊看讀金花誥畫戟閒凝燕寢香
預恐政高趨急詔海沂無計駐王祥

自笑微官馬骨高十年霜鬢雪刁騷長林豐草未適性
尖帽短靴安得豪名宦真同一鷄肋簿書空束兩牛腰
故園清興湖山裏歸去經營一把茅

清明前十日作

雨餘天氣動朝寒寒食都來數日間羯鼓催開小桃李

畫屏圍出好溪山
塵埃老我真堪笑
風物撩人欲破慳
梅雪已殘春半過
一尊何處與公閒

閻丘文晚集慶壽作詩戲之

桃李欲開風雨多
花時猶得屢經過
緩聽一曲玉連瑣
滿泛十分金卷荷
紅燭影紗聞喚馬
翠羅承襪見凌波
杜陵老矣孤春事
奈此詩愁惱亂何

明日復會客普照繼呈此詩去及瓜不數日矣

室中呼起散花天
來伴維摩到處禪
百刻篆香消畫水

一番花雨伴春妍
雲山真欲追鰲叟
風腋何妨借玉川
他日相思共明月
舊遊因說禁烟前

觀古作者梅詩戲成一章

翠袖佳人脩竹傍
風姿綽約破湖光
靜中慣識形神影
妙處誰知色味香
觀想有靈通水月
孤音無伴挾冰霜
故人愁絕今何許
烟雨霏霏子半黃

上施內翰

十年不見建安公
草木依然臭味同
賴有酒樽煩北海

可無香瓣禮南豐
天墀禮樂三千字
海國鷗鵬九萬風
正以高軒肯相過
免教書客感秋蓬

聞彥美服藥以詩問訊

耳邊塵事且無喧
聽我歸耕郭外村
賤子自藏蝸殼舍
故人誰並雀羅門
書窗共作三年計
尊酒相逢一笑溫
不信家山不堪隱
仇池今在古銅盆

次劉元直韻二首

秋來何事憶歸頻
正以家無妬婦津
未許桂枝招隱士

不妨桃葉贈行人
夢魂歷歷千山遠
客宦悠悠五斗貧
犀筋鸞刀許何日
歸來舉業得紛綸

半年歸夢別離間
只有音書雁足還
羅幕翠橫秋掩冉
玉壺紅濕淚爛斑
天明不作霧非霧
月破可憐山復山
准擬春風對眉臉
一尊相對洗愁顏

和曹次仲韻因以自感

自笑區區學道難
未容香火訪名山
因循憂患餘生裏
收斂光芒窘步間
白社祝公今日始
丹丘容我幾時還

相從願結翻經會共過壺中日月閒

陪諸友登三山亭

半濠清淺芰荷彫落日登臨未寂寥山色逼秋渾作市
海聲迎暮欲吞潮沙頭白鳥疑相熟木末青旗若見招
不似常時對官府可無閒話及漁樵

次韻夜雨

澗山何處是蓬瀛節物催人意自驚客裏厭逢今舊雨
夢餘愁聽短長更故園頗覺歸期緩老境難堪未段清

想得詩成正蕭瑟竹牕燈火夜微明

題歸去圖

筆端竒處發天藏事遠懷人涕泗滂餘子風流追魏晉
上人談笑自羲皇折腰五斗幾錢直去國十年三徑荒
安得一堂重寫照為公挂酒瀉蕉黃

寄題孔德通東園

花木陰陰一畝宮平生高興與誰同樽壘北海無虛日
鄉里東家有故風先業固知衣鉢在大門應惜橐奩空

襄陽耆舊今誰識尚喜風流見阿戎

昌邑道中

屋角雞號夜向晨
客牀相對話悲辛
沉離僅脫噲等伍
老大空為濟上人
却掃欲安無事費
累人猶說立錐貧
故山鄰里今安否
歸去同尋笋蕨春

題仲山枝巢

鏡中青鬢入霜皤
歲月從教落魄過
物理不容人過分
生涯休歎我無多
百年竟似蠅鑽紙
萬事終同鼠飲河

祇恐徐公宿緣在東風時夢海棠窠

過關渡水圖

短車無復駕青牛散策方來對白鷗
烟水從容許君獨暫須分我一船秋

河橋

桃李香中八九家青旗高挂綠楊斜
晚來風色渡頭急滿地蕭蕭楊白花

兩宋名賢小集卷三百六十三

欽定四庫全書

兩宋名賢小集卷三百六十四

宋 陳思 編

元 陳世隆 補

雁山吟

呂大亨字聲之

名字與
集互異

新昌人與仲弟沖之同師陳

傅良友蔡行之在太學齊名然困危久之乃授宿松尉徙平陽丞時嚴秤提之令大亨上不廢法下不病

民民尤便之終昭信軍節度推官所著有沃州雜詠
賀太常黃少卿

自從朝奏一封還便整歸裝問故山剩得清名千載重
何妨晚節十年閒慣尋夜雪逵溪路却謝春風漢殿班
國史舊編加簡討春秋直筆任詩刪

次新邑錢宰黃丞韻

一邑何期獲二賢花開滿縣總翩翩賦詩各出新機錦
裕國還饒內府錢槐竹兩行公事辦絲桐三弄政聲傳

作成和氣農家好多稼如雲詠大田

過杜潭題曾祖慶源庵

橫江灝氣欲欺衰木落千林水露洲
偶為搜荒投隴畝
因而展省到松楸神駒已應當年兆
祥筍還為後裔留
寄與老僧勤灑掃庭前橘綠桂香浮

和張主簿喜雪

夜讀書窗未覺貧朝看萬瓦沒魚鱗
飄來灞岍春風絮
瀉下瀛洲玉斛塵笑我冗懷多俗事
羨君清思獨凝神

遙憐夜月山陰道還有扁舟乘興人

題南巖寺

誰把長竿釣巨魚至今蹲石倚空虛
蜂房愛向山崖結鳥跡疑從海島居
入座翠嵐生晝寂夾川紅樹照春餘
任公此去三千載為看芳碑一嘅吁

遊石佛寺

金吾不必問行由此去道遙物外遊
半塢白雲藏宿霧一聲橫笛下歸牛
喜瞻傑閣三生像藐視叢林四海州

為寫濯纓疎拙句誰言墨跡至今留

題陳巖庵寄諸兄弟

地接丹丘姥嶺賒山盤曲折狀如蛇每因過此瞻雙隴
何必從旁置萬家孝弟本根時潤澤詩書種子日萌芽
到來豈但春秋祀酌水何妨一獻花

開禧丁卯重過龍門有懷方丈老子

翠屋交空結夏陰征鞍亭午喜登臨披開草棘千重路
洗出冰壺一片心禪老還尋江浙去詩家誰作楚梁吟

須知珠玉元無踵不惜西風惠我音

謝張漕薦剡

誰人洗甲挽天河玉宇無塵海不波漢使褰帷將命出
淮民挾纊被恩多流離豈但身安集凋瘵親曾手拊摩
惠利纔施催召亟其如席未及溫何

賀葉司業兼中書舍人

英妙才華四十年山林朝市姓名傳何妨萬斛橫江上
不礙千帆過目前我肯尾書千木紙人饒首著祖生鞭

金鑿何日商風雅伴直能呼孟浩然

寄太湖黃縣尉

立項談餘袂輒分乖離數數異朋羣君如天揭行空日
我亦風吹過嶺雲不許范張同飯黍空慙李杜共論文
睽違動涉經年裏碁壘詩壇要策勲

與丁撫幹

兩年肥水喜相逢託契門牆今已重士有彌衡心肯薦
侯如雍齒首先封更看謀略稱籌幄會見精神坐折衝

敗走將堅兵百萬圍棋別墅意從容

悼止齋陳先生

萬里長江發自岷作興一代有斯人
六經疑難言前解千古興亡筆下陳
愛向田間看耜耒肯留天上掌絲綸
如公到處鐫佳句今日池塘草自春

舒城道中

還轅天作十分晴瀉出秋光一派清
走筆欲題人到跡揚鞭不住馬嘶聲
項禾晚熟黃雲色籬菊朝含白露英

得似淵明便歸去候門童稚出歡迎

重陽桐城道中

萬古長淮一帶流從來戰地不容休間闕千里軍前餉
牢落重陽客裏秋悵望白衣來送酒了無黃菊與簪頭
何人早斷樓蘭首試解君王宵旰憂

九日登資福山呈胡宣教

飛屐來登最上峰千山擁翠景無窮遙看雲影參差外
靜聽泉聲斷續中今日黃花重九約何時青眼一尊同

好天風月閒相寄
早晚南來有過鴻

西寺留題

白石孤雲自在閒
紅塵一事不相關
寺遮翠靄青蘿外
人到落花流水間
欲效錦囊收勝槩
慚無玉帶鎮名山
白蓮喜結當年社
未厭朝來暮便還

題龍翔觀

曾到龍翔不記年
兩峰巍壓水中天
潮生潮落青蕪外
人去人來白鷺邊
四接遠遊僧萬笠
重新舊觀屋千椽

東南送目秋無際
隔岸人家問釣船

和黃教授山堂招飲

鼎彝事業未渠休
鷗鷺尋盟暫與儔
路入芝巖真絕地
客延蓬島盡名流
不辭一洗陶巾醉
更擬雙飛謝屐遊
誰賞洪都高閣句
落霞孤鶩唱漁舟

謝石主簿和章

多君養就大椿年
便腹詩書畫欲眠
絳闕當年名藉甚
白雲他日迹飄然
千軍筆掃人誰敵
九轉丹成世莫傳

倦眼功名旁袖手
剩看月露出新篇

詠桂花

獨占三秋壓衆芳
何誇橘綠與橙黃
自從分下月中種
果若飄來天際香
清影不嫌秋露白
新叢偏帶晚烟蒼
高枝已折却生手
萬斛奇芬貯錦囊

和王子寬韵

綠蔭千重竹清流
一帶溪子真耕谷
口楊震講關西手
摘星辰近名登泰華
齊古來公相業
誰不起鋤犁

春郊

勝日遊郊外嵐光入眼新
桃花開萬樹又是一年入

山行

山花雨後紅野草風前綠
浩歌歸去來不辱在知足

先春

梅花

不把春光較後先清香自是壓羣妍
微酸一點功成日
桃李從他逞少年

雲錦

桃花

擁蓋難遮萬臉紅
爛然雲錦直連空
更看雨過新粧洗
百媚都含一笑中

紫霄亭

半空烟雨有無間
碧玉屏開四面山
我欲紫霄亭上望
吹笙人去幾時還

未把浮漚閱世間
蓬萊一水隔三山
試窮千里登臨目
望斷青山白鳥還

芙蓉

楓葉飄林竹隔牆偏于冷淡逞濃粧
天教不趁繁華月
要是秋來獨耐霜

括蒼山行

微風吹雨濕欄干薄霧籠晴帶淺寒
一樹紅梅牆外發
誰家美麗倩人看

丹丘道中

夜宿溪頭十里村數星漁火照籬門
雁山峭絕經行處
猶帶烟霞入夢魂

縉雲道中

縉雲通道入皇都
花滿京城水滿湖
借問今來丞相府
後園人有醉歌無

遊石城山

祇因尋勝到林泉
四抱迴峰萬景連
僧過不知山隱寺
客來方見洞開天
浮圖照水光相映
古木依崖影倒懸
風露了非人世界
濯纓秋後玉壺天

過七里瀨懷古

七里灘頭訪子陵
水光山色見生平
欲為臣子定出處
知與君王分重輕
一介草茅真自負
三公軒冕未為榮
我來想像高風在
釣石巖前烟浪生

兩宋名賢小集卷三百六十四

欽定四庫全書

兩宋名賢小集卷三百六十五

宋 陳思 編

元 陳世隆 補

說劍集

呂定字仲安新昌人歷殿前都指麾有說劍集

懷古

我昔遊海上東望三神山風波幾萬里蒼茫雲靄間魚

龍自掀舞天空日月閒神仙渺無跡徐福去不還空餘
蓬萊閣千載留人窠

追和蘇子瞻遊峽山寺韻

山迴寶華閣水遶金鎖灣座慮頓焉息于茲開我顏疎
鐘日夕動老僧林下還天風吹白雲悠悠滿松關歸猿
有餘悲月明嘯空山仙人自何來翱翔八極間手把玉
芙蓉吟笑鏘珮環歌罷忽飛去千峰堆翠鬢

赴京

太白樓前雨乍收
畫船撾鼓上皇州
肯因離別牽愁思
要把勲名事壯遊
千里關河旗帶月
一天星斗劔橫秋
胷中賸有安邊策
此去應當獻冕旒

奉天門朝賀

曉日初臨萬歲山
寶幢華蓋列朝班
九重天上來仙樂
五色雲中識聖顏
深殿捲簾香霧裊
近臣傳制珮聲還
嵩呼齊祝恩如海
散作陽和滿世間

調兵

年少談兵膽氣豪折衝千里豈辭勞
旌旗影動秋風瑟鼓角聲回夜月高
紅錦裁鞍新試馬黃金裝帶舊懸刀
臨征自信軍容盛五色團花繡戰袍

扈駕

八月秋高戰馬肥觀兵郊外振天威
一聲鳳吹迎鸞馭五色龍文雜袞衣
劔戟橫空金氣肅旌旗映日綵雲飛
令嚴星火諸軍奮直斬單于塞上歸

班師

紫塞回來雪正晴
王師百萬擁連營
馬嘶大地山河壯
旂捲長空日月明
龍虎臺高千嶂聳
鳳皇城近五雲生
聖顏有喜天心順
中外歡聞奏凱聲

登東岳山

海內名山孰與齊
清風掖我上丹梯
鵬程九萬扶搖近
世界三千指顧低
瀑挂天門驚霹靂
雨蒸日觀出虹霓
太平會見東封盛
玉簡金書煥紫泥

雪夜

漠漠同雲徧海涯
曉風寒逼綠窗紗
飛揚鱗甲三千界
糝點樓臺百萬家
何處妙歌金帳酒
誰人清對玉梅花
便應石鼎融冰水
烏帽籠頭自煮茶

望岱岳

岱宗東望鬱嵯峨
萬丈仙橋鳥外過
秦樹千年空老大
漢碑終古不消磨
天壇夜靜乘星斗
石磴春深長薜蘿
記得舊遊曾載酒
頽然峰頂放長歌

望嶧山

極目東山秀色濃
紫霄千葉醉芙蓉
題詩尚記仙人洞
飛珮曾過玉女峰
樹老孤桐秋露下
碑殘古篆暮雲封
何時再醉天門月
卧聽清風萬壑松

登彭城樓

項王臺上白雲秋
亞夫墳前草樹稠
山色不隨人事改
水聲長近戍城流
空餘夜月龍神廟
無復春風燕子樓
楚漢興亡俱土壤
不須懷古重夷猶

戲馬臺

據鞍揮指八千兵昔日中原幾戰爭追鹿已無秦社稷
逝騅方嘆楚歌聲英雄事往人何在寂寞臺空艸自生
回首雲山青蟲蟲黃流依舊遠彭城

夜宿巖社湖

湖光如鏡迴無山耿耿銀河路可攀萬象不移天地外
一塵能到水雲間月明孤嶼森樓閣夜靜飛仙過珮環
借問孟城何處是微微燈火綠楊灣

金陵旅夜

一雨皇都萬象明東風嬌轉上林鶯
火烟亭館春多少
鐘鼓樓臺夜幾更枕上故園蝴蝶夢
枝頭斜月杜鵑聲
銀牋欲寫長相憶滾滾江流不盡情

過小孤山

八月靈槎溯海門翠雲臺上醉芳樽
峰頭樓閣相高下水底魚龍自吐吞
萬古青天留玉柱五更紅日湧金盆
宦遊不盡登臨興欲洗蒼苔頌聖恩

登翠雲臺

一柱中流亦壯哉分明世上有蓬萊
簾開廬阜層層出船汎岷山滾滾來
夜冷神龍蟠水府天青仙珮下瑤臺
閒將玉管吹明月勾引翩翩彩鳳迴

遊匡廬山

欲向匡廬觀瀑布便從彭蠡驟樓船
一聲長嘯來丹壑千丈飛流下碧天
洞裏樓臺無歲月雲中鷄犬有神仙
憑誰呼起巢松者醉擁宮袍對酒眠

度大庾嶺

鑿破鴻濛一竅通至今傳說九齡功
天垂瘴雨蠻烟外
路入炎荒火樹中
萬里關河瞻北極
兩行旌旆過南雄
鷓鴣聲裏端陽近
榕樹青青荔子紅

過峽山寺

峽江江上峽山寺
落日峰巒翠作堆
雲擁半空樓殿出
天然一幅畫圖開
仙人採藥和光洞
釋子翻經化樂臺
顧我紅塵車馬客
題詩無暇掃蒼苔

登越王臺

海上荒臺草樹平，登臨不盡古人情。
白雲萬里懷親舍，紅日中天望帝京。
百粵山川秋歷落，山城樓閣晚崢嶸。
醉來徙倚欄干曲，聽徹西風畫角聲。

浴日亭和蘇學士韻

危亭突兀倚青山，坐對扶桑碧海灣。
紫霧欲生龍伯廟，洪濤先涌虎門關。
光搖宇宙花生眼，影動闌干酒上顏。
遙望蓬萊宮闕曉，一輪飛挂碧雲間。

遊海珠寺

何年神物抱珠遊
遺向滄浪第一洲
五色化成金世界
六鼉擎出寶香樓
光涵蛟室星辰動
影落龍宮日月浮
萬古團團天地裏
磬聲敲出海門秋

登廣城樓

三尺龍泉事遠遊
越王臺上望南州
一天雨過千山曉
萬里風來五月秋
江郭樓臺蠻客市
海門烟日蜚家舟
臨戎不有安邊策
應愧常何薦馬周

謁金華寺六祖法堂

坐閱人間幾百年
雙趺渾似後來禪
空空明鏡臺前地
寂寂紅塵境外天
風動法林從虎過
雲生咒鉢解龍眠
至今月到層樓上
應共祥光午夜圓



兩宋名賢小集卷三百六十五

欽定四庫全書

集部

兩宋名賢小集卷三百

六至
辛

詳校官中書臣閔思毅

助教臣常循覆勘

總校官編修臣王燕緒

校對官編修臣王天祿

謄錄監生臣徐泰吉

欽定四庫全書

兩宋名賢小集卷三百六十六

宋 陳思 編

元 陳世隆 補

雪磯叢稿一

樂雷發字聲遠號雪磯江右春陵人登寶祐癸丑特
科廷對第一授館職丙辰以病歸遂不復出雪磯叢
藁五卷其友人朱嗣賢何克卿編校付梓時寶祐丁巳

也

九疑紫霞洞歌

猗與竒哉紫霞之洞真天開千變萬狀不可述恍疑幻
出壺中之蓬萊湘濱兩姝不敢到悵望蒼梧雲縹緲爾
來三千三百年斑龍空卧金光草我採姹女江華濱是
為三十六帝之外臣右持綠玉杖左攜紫金經長歌天
上謠一呼開仙扃列炬照深窈懸身事幽討羣仙喜我
來驚笑欲絕倒何侯撫我頂偉遠拍我肩綠華贈我金

條脫明期分我紅景丹借問此何地指言太虛天翠霞
紫雲張寶幄懸瓌結綠盤瓔珞萬疊蒼苔荒石田誰呼
青龍畊紫烟虎嶽銅牆未遍識擬開寶藏翻雲帙差我
水際披蓑翁應是籤鏗釣神龍仙人仙人何多事驚世
駭俗變靈異或跣距足乘天雲或印短趾流沙潯或見
姑射處子身粉霞紅綬藕絲帚或示普陀大士形或持
簪柳乘寶瓔或挿鏤象管或結火齊珍或琢玄圃玉或
布祇園金洞中之深不知幾百里但見縈紆屈折一里

一澗水人言有路通桂林乘興欲尋日華君吾聞洞中
大小洞天三十六帝遣列真分治局上界官府應更多
定知此洞今誰屬猗與竒哉紫霞之洞真天開我上會
稽探禹穴復浮滄海登天台岩谷豈無竒眎此何塵埃
摩挲崖石題惡句記我杖屨敲雲來黃涪翁元漫叟目
力一生空宇宙澹岩陽華有何竒枉費篇章劉石竇

謁李梅亭

力拔鯨牙氣貫虹玉堂歸只守文窮世無真魏扶吾道

人以乾淳望此翁
大地精靈藏筆下
國家命脈寄山中
緼袍羸駟崇仁路
正擬登門聽擊蒙

代送徐侍郎赴召

大廈誰堪任棟梁
試留齋艦問行藏
朝廷議論如春雨
吳蜀人材似夕陽
三漸何曾投砭劑
五寒今望起膏肓
擬看相業磨崖在
却到浯溪話別觴

聽友人談蜀道事

石棧天梯蕩戰塵
誰驅哨馬滿峩岷
盡看烏犬為君子

元次山
世化篇

誰問沙蟲化小人沙塞惟應悲望帝蜀材正自
欠吳璘細吟猛虎長蛇句空對西風泪滿巾

送廣州劉叔治倅欽州兼守事

天涯亭畔擁鞦屏丹荔黃蕉滿去程皂蓋却迎新別駕
碧幢應憶老先生象蹄印雨歸蠻國鯨鬣掀潮撼海城

曾是鄉賢分守處試尋醉石共題名

余靖韶州人曾守欽

逢熊季可

暮雲春樹飽相思今共秋風捋白髭北闕未知鸚鵡賦

南州空誦鷓鴣詩，旗亭尚喜缺能飲。
客路誰知朔獨飢，賴有湘翁生計在。且吟九辨擷江蘼。

送李煥雲超恭城主簿

恭城山水接三湘，應覺他鄉似故鄉。
宦况不妨栖枳棘，客程還見食檳榔。
寒暄未定宜加愛，事業無窮要自強。
千古忠魂如可問，試吟離月漱詩腸。

寄李伯輝

石嶺峰下寄吟身，靜掩柴樞琢楚珍。
蘋草青莎招隱士

暮雲春樹憶詩人門無車馬多嫌僻家有圖書不似貧
擬借大鵬指老眼何時樽酒得相親

舜祠送桂林友人

堯山分首舜山逢呼酒旂亭兩鬢蓬客思且須論契濶
詩交應不計窮通兒曹富貴秋烟外前輩風流落葉中
明日吟船又何處渡江衣冷荻花風

訪伯父幽居

對坐如禪舍閒燒石乳香書看新講義藥問未傳方僕

語梅花裏僧經竹葉旁題詩吾豈敢窗戶半吟章

桂林懷李景魏

陽華雲萬疊無計得相尋所學皆時好何人知爾心
莎城百粵遠雪嶠一翁吟已是懷人極天寒滌水深

桂林送人之瓊州招捕海寇

嘗家州畔路別爾苦匆匆說劍令人喜耽吟與我同
旌旗楓鬼雨舟楫鯨鯨風想到瓊峰頂題詩更紀功

與李盤翁知縣登七星山弔石道士

疊嶂轟空青耽竒共一尋苔荒碑意古茗苦道情深有
興梯蒼壁無才咏玉簪吟仙何處去我輩復登臨

次韻史主簿雨夜見寄

水長許由溪春寒入竹扉幾人聽夜雨惟我怯單衣樹
罅青燈耿籬根白菌肥明朝有忙事推枕問漁磯

贈李伯輝家譜詩

盪寇將軍汨唐朝李邵家綠華雙薦者况復古今誇

趙司法集詩自題近道盖取工部所貽元隱居詩

中語也因書二絕

和徧陶翁飲酒詩醉籠天地入鴟夷細看官爵成何物
肯帶奚囊過九疑

浣花騷伯杳難缺世上寧無元隱居讀罷君詩三歎息
斷絃綠綺定何如

聽廬山胡道士彈離騷

廬山道士玉潭仙前世滄浪握楚荃莫道離騷遺響絕
孤鈎寡珥尚能傳

弔湘誰解薦江蘺忠憤泠泠寫七絲愁絕九疑山下聽
重華應許就敝詞

題王克章佇香亭

滿池蜀錦照深衣盡日憑欄課楚詞要識此花香絕處
露涼風細雨晴時

對花味道興何長好學顏家到坐忘莫與紅塵兒輩道
心清正是得真香

故園荷屋傍濂溪苦愛蓮花入夢思今日題詩還自笑

江湖塵土鬢成絲

詠史六首

高祖

逝驩走鹿各消磨
劍外功臣剩幾多
四皓兩生原不聽
故鄉枉費大風歌

陳勝吳廣

假號偷名只可憐
枉拋錢鏹弄戈鋌
隴頭燕雀應相笑
鴻鵠原來是項燕

韓信

愁看鐘室劈良弓，何不當時殺蒯通。
今日真王成底事，只應娥姁是英雄。

東方朔

蜥蜴盤邊解滑稽，且分社肉飽蛾眉。
劉郎最怕秋風冷，那得君言換殿帷。

司馬相如

狗監無端薦薄情，鸚鵡裘犢鼻帝鄉塵。
當時最有文君恨。

不識長門買賦人

班固

請室冤魂叫不聞
神丘隆碣漫遺文
平生詞藻誰知已
腐鼠狐雛却誤君

送董炎震歸攸縣

千菊溪頭話別情
君行我住兩伶俜
山中有酒招元亮
石上無禾養伯齡
狼尾屋低苔漠漠
龍鬚菜長水泠泠
故鄉語燕應堪聽
莫放扁舟過洞庭

贈衡山侯霖

家住衡山茗塢深
軒轅道士是知音
宸樽酒好聊同醉
石鼎詩難莫浪吟
雨外虺隤寒食路
花邊格磔故鄉心
却懷世上揚雄少
腸斷侯芭何處尋

送駱起謁襄帥廣西憲

知君無地種江蘼
看了衡山看九疑
客路不堪還話別
侯門何處可題詩
吟青羅帶行離岸
唱白銅鞮過習池
呼酒試澆征馬足
繡臺油幕有相知

題豫章宋德父遊湘詩卷

醉呼仙叟共浮湘，稠載風烟滿錦囊。
名似浦雲山雨起，詩連沅芷澧蘭香。
好吟秋月招元結，莫賦朝雲惱楚襄。
英巨老仙今寂寞，行人還解識珩璜。

常寧道中懷許介之

雨過池塘露未乾，人家桑柘帶春寒。
野巫豎石為神像，稚子搓泥作藥丸。
柳下兩姝爭餉路，花邊一犬吠征鞍。
行吟不得東溪聽，借硯邨廬自寫看。

烏烏歌

莫讀書莫讀書惠施五車今何如請君為我熱却離騷
賦我亦為君劈碎太極圖搗來相就飲斗酒聽我仰天
呼烏烏深衣大帶講唐虞不如長纓繫單于吮毫搦管
賦子虛不如快鞭躍的盧君不見前年敵兵破巴渝今
年敵兵屠城都風塵瀕洞兮虎豹塞途殺人如麻兮流
血成湖眉山書院嘶哨馬浣花草堂巢妖狐何人笞中
行何人縛可汗何人丸泥封函谷何人三箭定天山大

宛若箕兮高劍拄頤朝談回軻兮夕講濂伊綬若若兮
印累累九州博大兮君今何之有金須碎作僕姑有鐵
須鑄作蒺藜我當贈君以湛盧青萍之劍君當報我以
太乙白鵲之旗萬里橫行取金印何用區區章句為死
諸葛兮能走仲達非孔子兮孰却萊夷噫歌烏烏兮使
我不怡莫讀書成書癡

寄雪篷姚使君

贈君昆吾湛盧之寶劍青雀黃龍之巨航懸黎垂棘之

美玉都梁篤耨之名香佳人佳人在何處濯足洞庭望
八荒揚車翻翻薜芷綠欲往從之道阻長倚寶劍兮翼
軫膠巨航兮沅湘玉以彰君子禦身之德香以表騷人
流世之芳我所思兮隔秋水天吳翕忽琉璃翔佳人偃
蹇定誰與愛而不見心盡傷

汴堤柳

萬縷春風宰汴堤錦颿何處柳空垂流鶯應有兒孫在
問著隋朝總不知

讀李羣玉集

光順門前繫馬頻，弘文館裏翠雲春。
却憐白首河西尉，枉作蓬萊獻賦人。

捐玦江頭弄釣舟，菊花杜若滿芳洲。
如何才子無騷思，只詠薔薇與石榴。

與復古叔讀橫渠正蒙書

惆悵枯林與晬盤，雲橫太白夢魂安。
半生驕客如蝸縮，自把西銘反覆看。

誰掘驪山起老師竹林燈火共心期
年來後學輕前輩
看徹臯比罷講時

次韻熊雲瀑秋夜見寄

吹落秋窻燭炮紅
想彈九辨入絲桐
荳蘗豈不如葵菽
誰繼幽風補楚風

題昭州田廷亮書橐後

檳榔口裏吐參苓
折檻無門九虎深
家在道鄉亭畔住
定應千古有知音

少海無波鶴禁虛滿朝閉口養曹蜍白袍烏帽和寧外
却有山人請建儲

兩宋名賢小集卷三百六十六

欽定四庫全書

兩宋名賢小集卷三百六十七

宋 陳思 編

元 陳世隆 補

雪磯叢藁二

題楊誠齋行湘詩卷

仙雲寒鎖碧瑤天
突兀吟壇北斗邊
試問鳳凰誰得髓

竹林聽雪對牀眠

叫雲吹玉舜祠邊醉嚼瓊糜漱石泉舊讀離騷今忘却
快披秋卷嗅蘭荃

題許介之譽文堂

端平丙申桂林伯尚書鍾公以遺逸薦東溪先生許
侯于朝越明年得旨補初品官衛州戶掾其誥詞於
始則有夙有譽處且嫻文辭之褒于終則有其以行
義教于鄉里之勉州里人士莫不榮之又明年許侯
乃于東溪之濱泐堂五間以為講道著書之地仍摘

天語譽文二字以張其名敬上賜也堂成山齊先生
為之記者詳矣當世之名卿大夫又為之賦詠者衆
矣願余侯三字非
衍疑悞晚生小子何足言詩辱徵俚作不
敢固以陋辭敬書二首以記盛事併叙聖天子始終
褒勉之意庶得附姓名于不朽云

曾佐元戎洗綠林此翁何止擅詩聲久辭驃騎尋瓢飲
誰引鳴騶賸耦耕厚禮正羅溫處士浮名還汙阮先生
衡茅那識絲綸美尚擬升堂結社盟

姜夔劉過竟何依空向江湖老布衣造化忌名從古有
詩人得位似君稀聖朝自要求參朮吾道何應賤蕨薇
晚節黃花須愛護且教湘士挹芳菲

漁溪書院弔曾景建

太極樓頭霽月寒斷絃綠綺不堪彈
牕前自長漁溪草澤畔還枯正則
蘭蒼野騷魂惟我弔烏臺詩案倩誰刊
傷心空有金陵集留與江湖洒淚看

許介之以丞相周益公所書古樂府四篇見寄敬

題其後

紙上珊瑚間木難曾敲黃閣却征鞍賞音今有王園否
得句堪尋岫嶠刊鸚鵡夜栖金屋冷的盧秋戰玉關寒
春風歸雁那知己寄與深宮絕塞者

讀繫年錄紹興八年以後事

婁敬金繒滿去輒便看雷雨潤遐陬諸賢自抗排雲議
宰相方深偃月謀湘國乍聞悲鵬鳥秣陵還聽唱符鳩
九原晏老今知否搔首青編恨未休

櫟欄吳大帝廟

赤壁濡須事已虛且依櫟欄酌芳壺九原尚擬吞銅雀
千載今惟記赤烏湘浦有人修舊祀荊州無地展雄圖
定知斫案英靈在閒對祠前洗湛盧

昭陵渡馬伏波廟

功名要結後人知馬革何妨死裹屍漢帝可能疑薏苡
湘民却解薦江蘿紙錢撩亂王分胙粉壁爛斑客寫詩
墮水跼鳶無處問灘頭斜照晒鷓鴣

訪蕭太山父子

仙桂靈椿各典型
飄飄姿韻激天鯨
家傳八葉鹽梅種
詩接三蘓父子名
四海盡將看縣譜
一堂那與許文盟
塵埃不敢相親炙
且汲渝溪濯客纓

謁張兵部時守臨江新除湖南倉

東皇太乙待新詩
共喜新槎沂楚涯
父老盡將看鸞鷲
使臣應不問狐狸
江頭芳杜催行色
境內甘棠有去思
細讀詔書搔短鬢
瓣香那識帝王師

蘓瑩中先往新淦過新淦訪之不遇賦詩為寄

玉筍山前水拍空知君何處繫吟蓬敢輕竒士題凡鳥
漫有憂心咏草蟲沅芷澧蘭猶可寄江雲浦樹苦難同
門前景物皆詩卷獨倚簷簷嘯晚風

胡料院出示車攻圖仍索俚作

九壤卧龍呼不起乳臭談兵空滿耳書生未識玉帳經
且抱此圖究終始姬家出車咏嬴家小戎詩衛家武剛
扞突騎馬家偏廂是羌夷只今車陣無人識天狗橫空

酒腥血邊人以鞍馬為家誰馭奔衝展竒策豫章先生
今孔明胷中森羅萬甲兵天衡地軸妙絕識內陣外陣
何縱橫千枝綠沉列虡虎萬臂黃間張白羽人言險野
難用車公獨規模掩前古車攻圖車攻說八采眉前曾
進徹世人苦謗陳濤斜却向齊門鼓空瑟今朝朱川富
川頭絕江川北瞻神州李綱正要講車戰南渡勛業應
可收涇水黃鐵山碎雙輪快碾幽燕地朗誦先生復古
篇他時此筆猶難記

壺中天歌贈侯明文

蓋頭即可居容膝即可安連雲大廈千萬間何如壺中
宇宙寬壺中何所有筆牀茶竈葫蘆酒壺中何所為目
飛送鴻揮園絲窻前祝融老僧竹壁上九疑狂客詩壺
中主人知為誰啖棗仙伯雪鶴姿左攬元微袂笑移砥
柱弄河水右拍長房肩飽飡麟脯傾玉泉蓬萊山在何處
勸君且占壺中住不曾上列金馬門也應不識崖州路
探禹穴浮沅湘脚下塵土鬢上霜我到壺中如故鄉

道中逢老儒由蜀出

丙穴魚應好曾經問釣磯
干戈今未定城郭是耶非
詩社尊黃髮侯門薄布衣
乾坤豺虎滿見爾一歎歎

時事

時事如頽屋誰堪任棟梁
國貧僧牒賤邊病檄書忙
有分憂宗社無方出舉場
未應王謝輩揮淚送斜陽

逃戶

租帖名猶在何人納稅錢
燒侵無主墓地占沒官田邊

國干戈滿蠻州瘴癘偏不知
攜老稚何處就豐年

登江華寒亭

到此脚跟酸千峰迫不看年
深碑字淺日薄樹陰寒石
罅巢蜂乳籬根墮鳥殘愛吟
還畏冷不敢倚闌干

訪表叔李竹齋

門庭接豆根吟避市塵喧
每愛詩無敵應知學有源
雲山供俎豆筆硯長兒孫愧
我相過數秋風酒一樽

擬長沙訪姚雪篷至永而返賦寄

今傍南軒住應知理趣精通書多似易論語不言誠擬
欲聽微論猶能慰別情江湖風浪隔腸斷楚鴻聲

送蕭太山赴新興令

翡翠芙蓉去路荒許渾詩裏認封疆昔聞古佛傳宗印
今得吟仙綰縣章魚婢蟹奴供俎豆馬人龍戶雜畊桑
澹翁應解知心事試汲寒泉薦瓣香

訪菊花山人沈莊可

網盡珊瑚採盡珠只餐秋菊養詩臞永嘉同社聲名在

乾道遺民行輩孤我恨朱門無食客君言青史有窮儒
飢寒正用昌吾道且對鈴岡共撚鬚

懷二蕭

未曾相見已相知楚粵江山棣萼詩每恨乾坤催我老
却于湖海識君遲機雲才藻今無幾管鮑襟期話向誰
靡靡亂山嘶瘦馬碧雲日暮正相思

踈拙

越冠齊瑟事皆非踈拙唯甘與世違客路鶯花愁裏看

故人烟雨夢中歸，采薇有備淮南靜。
移粟無謀浙右饑，納納乾坤須俊傑。
湘翁只合製荷衣。

陳東甫酒間舉作歸心只有杜鵑知之句，猶未成篇，因為續之。

歸心只有杜鵑知，且倚裴亭共撚髭。
客路秋風吹杜若，故園春雨老辛夷。
家貧未辦閒居賦，世濁空吟感寓詩。
邂逅江湖還別去，岸花牆燕兩堪悲。

贈別陳東甫呈鍾尚書

洞庭濯足共題詩
今聽驪駒話別離
泣玉可能悲卞子
買金只合鑄鍾期
荷盤剪綵須栖鷺
缺項分絲補接羅
斗酒彘肩聊自壯
古來騷客例寒餓

登潭州懷雪蓬姚使君

賈井裴亭徧短筇
紅塵歸騎又匆匆
我尋桂樹吟招隱
君對蓮花誦易通
今日江山勞別夢
他年燈火課新功
濂溪最念初平老
恨聽聯牀話未終

下攝市

吟到湘潭一葉黃
賈胡踪跡正悲涼
抱琴沽酒異鄉客
打鼓發船何郡郎
楚女越商相雜沓
淮鹽浙堵自低昂
塵埃市井無人識
濯足江頭望八荒

無題

犬袖褰衣走浙淮
何人不識鶴山來
只今心印誰傳
得自摺通書撥篆灰

撫州偶題

金柅亭邊柳拂城
春風繫馬酒家吟
塵埃滿面無人識

却得黃鸝作賞音

萍鄉病渴

犬子無從典驢驢荒村忍渴望瀟湘
楚王萍實甜如蜜不許詩人取次嘗

甲午社日客桂林

卮酒豚蹄客裏歡石尤風緊袈衣單
東陽病骨如鸚鵡最怯南州社日寒

桂林歲晚憶鍾尚書

塵滿湘翁薜荔衣
江湖歲晚鬢成絲
桂州楊五今何處
雪片梅花枉費詩

雲峰寺

擬尋岫嶠看螭螭
且解青鞋濯禹溪
弔古猶疑九枝柏
談禪且問一莖虀
虎低崖樹供僧爨
猿摸廊碑認客題
應接溪山無好句
滿林空羨亂蟬嘶

欽定四庫全書

兩宋名賢小集
卷三百六十七

兩宋名賢小集卷三百六十七